

SNACKEN UN VERSTAHN

NWZ
26. Jan. 2021



De beiden Schöffels hefft veel beleevt ...

... just so as de rode Pappnääs un de ole Kuffer, de all vandaag mit us snackt.

BILD: PRIVAT

Twée Schöffels vertellen sük wat

VON ERHARD BRÜCHERT
(OOSTFREESK PLATT)

„Büst du noch scharp?“
„Nee – du denn?“ „Ik?“
Nee, ik hebb doch al dickrood Röst ansett...“

Twée moderne Laang-Schöffels – mit Klapp-Mechanik – dösen up een moij, warm Kommood mit fein Utblick in 'n Goorn, wor obers – so as in de verleden Wintermaand al – keeneen Flocken van Sneer un keenen Stücken van Iis up de Waterpool to seen is. De beid Speziaal-Schöffels för Laanglop weern Twennels – un hör Baas harr hör de Naams „Viking, rechte Siet“ un „Viking, linke Siet“ gäben. Anners kunn he de beiden Hübschen un Slanken (ut Holland) gor nicht utnannerhollen, wenn he – mit de beiden ünner sien flinke Foten un Beenen – in Sweet öwer de fastfroom Deeps,

Sloote un Meere in Oostfreesland jogen dee – domols in 'n Winter, up dat Marmoris, as dat noch Winter gäv. Man nu harrn de beid Twennels al twee Sömmer un twee Winter nix meer to doon hatt.

Moot un Muckis

Wenn hör Baas nich so riek weer un se mit eegen Middeln ünnerhollen dee, denn kunnen se woll Hartz Veer anmelden. Se wussen tja ok gor nich meer, off se noch de Moot un de Muckis harrn, noch veertig, fieftig Kilometers van Timmel bit Greetsiel dörtohollen – un an de Elfstedentocht öwer 200 Kilometers muchen se gar nich meer denken. „Man, ik hebb höört...“, vertell de Linke, „...de plietschen Holländers, de sünd nu doch düchtig vergrellt, dat de Klimakatastroph hör de Tocht

der Tochten klaut hett, de maken nu elke Winter een Elfstedentocht-Alternatieve.“ „Wo sall dat denn angahn... Alternatieve...“, wunner sük de anner Viking, van rechter Hand. De Linke wüss Bescheed: „Dat maken se dor boben in dat ewige Iis in Sweden or in Finnland – un ok in Weißensee, weestst woll, dor ünner in de Süd-Alpen!“ „Du büst woll mall...“ meen de anner Viking, „Süd-Alpen... dat is doch al Italien. Un in Italien is dat noch warmer as in Holland un Ostfreesland! Dat weet ik!“ „Du Slaufox! Doch nich up de Högde van 1600 Meters! Dor gifft dat noch alltiet moij Fröst.“ „In de Alpen smelden doch all Gletschers.“ „Na un? Wullt du denn up 'n Gletscher schöffeln...?“ „Nee, will ik nicht – obers ik weet ok, dat uns Baas een echten Iis-Laangloper is un keen Alpinist. Dat Rebett

hett he Reinhold Messner överlaten.“ „Du meenst also, wi kunnen in disse Januar ok nich mit uns Baas in Weißensee schöffeln – dat is doch för hum nich so wiet as na Finnland henn...“, mit sien oolen Diesel.“

Mit 'n oolen Fleeger

„Nee, dat glöw ik nich... uns Baas kweem tja jüst ut de Waarmte van Teneriffa torügg, mit 'n oolen Fleeger. Un nu mutt he eerst mol de Quarantäne för Madamm Corona in sien Home-Office affsitten... mit de Keerl kannst du nu überhaupt nich proten.“ „Tscha... Klimakatastroph Arm in Arm mit Madamm Corona... dat höllt doch keen Düwel ut!“

„Woso? Wi sitten doch nu all in Home-Office...worüm nich ok de Düwel?“